



Mariute e jere spirtade e a vot agns a 'nt cumbinave une in dî, cualchi volte ancje dôs. E jere piês di un mascjat e plene di curiositât par dut ce che i pareve une novitât. A scuele e jere simpri la prime a alçâ la man cuant che la mestre e domandave: “Chi mi sa risponder?” e lis amiis a jerin invidiosis pal so snait. Zuiant po, nissun le bateve, sedi di zûcs par frutis che cui mascjos.

Vuê, passant pe place, tornant a cjase di scuele, i cole il voli sul cartelon cun la reclame di un cine di vuere. Il dissen dai soldâts che vignivin ju dal cîl peats sot di une grande ombrene blancje i reste tal cjâf e gustant e domande notiziis a so pari. Chel i spieghe che si trate dal parecjadudis e che i soldâts lu doprin par butâsi ju dai avions, cence fâsi mâl. Mariute subit e pense che e volarès provâ ancje jê, che di sigûr al varès di sedi une vore biel. Ma butâsi di dulà; jê un avion no lu à e nancje une ombrene cussì grande come chê dal manifest. “Ma jo o soi piçule e forsit no covente une ombrenone cetant grande” e pense. Subit il pinsîr al va ae ombrene di so pari, che i veve simpri someât grandonone e po e pense ancje di dulà butâsi: “Ma sî, dal puiûl, che al è vonde alt sul curtîl”. Dute contente par vê cjatât la cumbine, Mariute si organize par l’esperiment. Cjapade su la ombrene di so pari vie sù pes scjalis e

rivade sul puiûl e cîr il puest plui adat par il lancio. “Achì sot a son i vâs di mê mari e chel cun la plante grasse al à lis spinis, miôr plui in là”. Intant che e sielç il puest, so fradi Carlet dal curtîl, viodint so sùr lâ indenant e indaûr sul puiûl e cun la ombrene sot dal braç, i domande ce che e fâs. “Tâs che o ai di fâ un experiment”, i fâs jê. “Ancje jo, ancje jo” al zighe il piçul e Mariute, par fâlu tasè lu clame sul puiûl. Po ben, cjatât il puest e vierç la ombrene e sentade sul parepet e sta par butâsi cuant che il piçul al tache a frignâ “Ancje jo, ancje jo”. Mariute, par stropâi la bocje lu cjape sù, “Tant al pese pôc” e pense e tignintsi salde tal mani de ombrene, si bute ju cun sô fradi intal braç. Intun marilamp a plombin tal curtîl cuntun ton, e ju vaiudis. Mariute cui zenoi scussâts e cuntune biele pache sul cûl e vai par la dulie, Carlet al zighe disperât, plui pal spavent che par lis pachis. La none Meneghine, che e jere impisulide su la cjadree fûr de quarte di cjase, sveade di colp e a viodi i doi fruts a pene colâts dal puiûl, e tache a zigâ. La mari dai fruts, jessude di corse e cence pierdi timp, i da doi scapelots a Mariute; no par nuie, ma e veve rot la ombrene!

***di Pauli Jacuz***